

【燈籠】賴文英原作

老頭擺，逐年正月半个燈籠節，隔壁鄰舍个細人仔，長透會湊等共下，自家來做自家个燈籠，故所，佢兜燈籠个材質就用該兜手項便便做得用个，有蘿蔔仔、銅笏仔、紙仔這兜。佢最中意蘿蔔仔透出來个光，該係用湯匙摻蘿蔔仔中央个肉身部分挖空，當然，挖出來个部分還係做得煮來食，若係就恁樣丟忒，該就打爽，老一輩个人總係會分佢兜細人仔一隻觀念，做得用个抑係做得食个東西就做毋得儘採打爽忒，若係講就恁樣摻佢攞攞忒去，該就係「折福」。

燈籠做好，大家在暗摸胥疏个暗晡頭，儕儕手項都有一盞燈籠，摻等燈籠，遶到禾埕、田脣、竹林間、陂塘礮，滿哪仔冒險，試著恁樣形搞當生趣。在四圍無光害个莊下肚項，單淨就月光、星仔个夜色，還過火焰蟲摻燈籠光照等偲大自家、指引等方向。該央時，大家還會共下唸唱一條在莊下時行又應景个童謠：

火焰蟲，唧唧蟲，楊梅樹下吊燈籠；燈籠光，照四方，四方暗，跌落炭……。

這隻時代，一到元宵節个前一站仔，街項滿哪仔都看得著店

面掛等花啦必駁个燈籠造型，也為著錫小朋友來買，有百百款个造型，全部都係塑膠製品，重點係毋使再過點蠟燭了，大概也係為著蠟燭火會帶來危險，驚細人仔一無注意著就火燒屋，故所，這下都係用電火球个燈籠。單淨一隻開關，加上電池，揸啊去，火就著了，再過揸啊去，電火就做得關忒了。在屋肚暗冬冬仔个地方，一開一關，燈籠光也就一明一滅，細人仔也就享受等恁樣个氣氛。毋過，細人仔搞到當歡喜過後，該隻燈籠毋係因為壞忒來分人丟忒，無就新鮮感無哩，分人擲到邊脣放，毋會再過分人重視了。包尾，佢還係分人準垃圾分垃圾車載走。物質算係罇用个時代，分後生人這一代嘎毋知麼个安到「做惜」，也毋知麼个安到「折福」這兜語詞真正个意涵！

想想啊，還係當懷念老頭擺个燈籠節！雖然時代一直在進步，物質也緊用緊好，毋過，偲大自家應當愛來思考，愛仰般形摻老頭擺好个文化「做惜」摻「莫折福」恁好个意義，一代一代篤篤實實个傳承下去！